

Jumaat PAS Syorkan Undang-undang Sivil Turut Dipinda Bagi Suaikan Dengan Hukum Hudud
mStar Online
Oktober 28, 2011
Oleh ARIFFUDDIN ISHAK

PETALING JAYA: PAS Kelantan mencadangkan agar undang-undang jenayah sivil dipinda bagi memastikan hukumannya setimpal dengan undang-undang hudud yang bakal dilaksanakan di negeri itu.

Exco Pembangunan Islam, Pendidikan dan Dakwah Negeri Kelantan, Datuk Mohd Amar Nik Abdullah berkata, pindaan tersebut perlu dilakukan bagi memastikan hukuman terhadap sesuatu kesalahan oleh orang Islam dan bukan Islam menjadi adil dan saksama.

"Bukan mesti nak sama (hukuman terhadap orang Islam dan bukan Islam), tapi apa yang penting ialah meletakkan sesuatu pada tempatnya.

"Kalau kita rasa hukuman kes sivil tidak berat, kita beratkan hukuman," katanya kepada *mStar Online* di sini, Jumaat.

Beliau berkata demikian sebagai mengulas mengenai kenyataan Tun Dr Mahathir Mohamad yang mempersoalkan sama ada undang-undang hudud PAS boleh memberi keadilan kepada penduduk berbilang agama di negara ini terutama dari segi hukuman apabila ia dilaksanakan.

Bekas Perdana Menteri itu turut mempersoalkan mengenai bentuk hukuman yang bakal diterima oleh pesalah beragama Islam dan bukan Islam bagi kesalahan yang sama.

Bagaimanapun Mohd Amar meminta semua pihak sama ada yang beragama Islam atau bukan Islam agar tidak melihat hukum hudud hanya daripada sudut hukuman semata-mata.

Sebaliknya beliau berkata, tujuan hukum hudud dilaksanakan adalah untuk mencegah umat Islam daripada melakukan kesalahan yang bertentangan dengan agama mereka.

"Kalau tak buat salah buat apa nak takut? Hudud hanya untuk orang jahat, kalau tak jahat...hudud tak akan bebankan kita," katanya.

Selain itu Mohd Amar berkata, hukuman bagi sesuatu kesalahan di bawah undang-undang hudud tidak akan dilaksanakan dengan mudah.

Menurutnya, proses mendapatkan keadilan bagi seseorang yang disyaki bersalah akan melalui beberapa peringkat.

"Tak perlu bimbang, bukan senang kita nak potong tangan orang. Proses pembuktian bagi sesuatu kesalahan adalah sangat ketat.

"Kadang-kadang kalau seseorang itu memang disahkan mencuri, kita kena tahu juga sebab apa dia mencuri. Kalau orang susah atau fakir yang mencuri untuk makan, hukuman tidak akan dijatuhkan," katanya.

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/10/28/mstar_berita/20111028155325&sec=mstar_berita